



STINAPA TA INFORMA

KUARENTA AÑA SIN MIRA LAMAN

Elsa Molina-Bernabela ta un señora masha spòrtif mes i gusta tene su kurpa nèchi. Pesei no ta nada straño ku e tin 16 aña kaba komo empleada na un perfumeria den sentro di Playa. Ademas di su deportenan manera dominó, e tin su man yen ku malkriá su 4 yu i 5 nietu. Lokual Elsa ta gosa di e naturalesa boneriano ta ku bo ta “sali, hañ’é mesora”, manera e mes ta indiká. Siendo ku hasta na e islanan pegá ku nos bo tin ku kore leu promé ku bo topa ku naturalesa. Komo ehèmpel e ta duna su mesun kurá di kas ku ta keda kasi den sentro di Playa. Tur sorto di para bo ta enkontrá manera buladui, trupial pretu, chuchubi, trupial gewon i patrushinan ku tur biaha ta bin broei den nan balkon. Seru Largu ta un di su lugánan faborito dor ku bo ta wak e bunitesa di Boneiru kompletu. Speshalmente despues di yobida. I alabes bo por wak e laman. Gotomeer seguidamente tambe ta un lugá ku e gusta. Na e bahada, kaminda tin e bankinan e ta disfrutá di paisahe i su splendor. Otro parti ku ta fasiné ta e Zoutpannen dor di e kambionan di koló. I por último Toeristenweg ku su baranka i gròtnan úniko tambe ta un di su lugánan stimá. Nos naturalesa sigur ta atraé turistanan. Hopi turista ta bis’é durante su trabou kon largu nan tin ku biaha pero ku asina mes nan kier hasié pa bishita Boneiru. Un turista di 40 aña a bis’é ku ta pa promé biaha el a wak laman asina djaserka. Ya ku na su país e mester biaha oranan largu pa wak’é. El a keda para na Malekon manera hende ku no kier a kita nunca mas fo’i djei. Elsa ta pidi pa kuida nos naturalesa. E mes no ta gusta pa kap palu, ni ora di limpia su kurá. Palu ta trese no solamente freskura pero tambe ta bon pa nos salú (medisina, rosea etc). Elsa ta enfatisá ku nos no mester kuida e naturalesa i medio ambiente pa e turista so, sino pa nos mes tambe. *Skirbí pa Natalie Wanga, tradusí pa Marcel Nahr.*

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURALES



Traha huntu na un desaroyo duradero pa Boneiru